

四庫全書

集部

欽定四庫全書

公是集卷十四

宋 劉敞 撰

五言古詩

獨釣南湖

澄澄春波深中有魴與鯉無人收潛隱好生得吾子投竿坐孤石盡日倦未起既失常若驚有逢忽然喜子心豈殘物子道豈娛已人誰辨子意我請盡其理垂釣須

得鮮治國須得賢所以不憚勤豈無蝦魚間君子愛其
君諷諭以為先詹何臧大人古事皆已然誰將子之術
更誦吾君前

負暄四首

歲晚天地閉積陰凍乾坤大鈞止亭育羣鬼私自尊竊
弄造化柄擅令衆陰存幽奸發玄漠死氣蒸黎元朋黨
漸相蔽大辰訴其冤帝惟百物憂恐不見陽春敕使拘
衆鬼朝曦送微溫大明煥幽鬱和氣迴崑崙初曉尚餘

稟漸高遂增暄煩冥避窮朔玉燭調中原衆熱久僵倅
今來更騰騫微禽鷄與雀弄影勢飛翻草木反生意益
思擢鮮繁潛魚離冰穴無數遊清源嗟我同此慶兀然
坐朝昏緼袍幸可賴卒歲無復論稍稍出辭氣仰天荷
公恩始知過狐白願得陳至尊昔宋有愚叟亦能款君
門況今事西討十萬羅縶韃烽火通警急鐵衣遠夷蕃
辛悲墮指魄少慰無衣魂誠使勝挾纊豈在衣便蕃斯
言出感激忠信非詐諉何由露天聽虎豹守天閭

南極無永晝北方多苦寒負暄意頗適容膝居亦安嘯
傲長者轍崔嵬切雲冠道書異俗味稚子同大歡不覺
老將至安知利害端

被褐暖不足負暄溫有餘內慙意氣狹婉孌在庭除清
晨倚西楹夕暮守東隅常恐浮雲起冰雪不須臾靳靳
懷薄願安得留飛鳥

日出東南隅晨光散瞳矐山形西北去暖氣浮冲融天
地大逆旅客身一飄蓬胡雛啼朝霜邊馬嘶朔風獨懷

負暄樂未許斯人同歸當獻天子無乃笑愚忠

遊仙

焦明忌常處蟪蛄愁永年淺俗更相訾曠懷自邈然我
從造化遊負立萬物先四海固咫尺大椿不獨延日月
為我駕昏明回旋超遙無終薄浩蕩遺拘蠶豈與功
明士姝姝以暖暖智極蝸角下形倣陽榮間

種萱

種萱不種蘭自謂憂易忘綠葉何萋萋春愁更茫茫古

人有虛語名實未必當南箕與北斗燦爛空成章

讀莊子三首

簫韶豈不美爰居終自悲俛仰魯城上驚顧不能怡
伊昔舜廷內鳴鳳為來儀和聲詎中變衆聽邈難齊澆淳
懸異代聰昧未殊施咄嗟播鼓武永乏滄海歸

漢陰灌園叟抱甕力難任規為一何拙機事自傷心
賜也不受命媿之汗沾襟至言與世邈幽操非俗尋
以此高宇宙豈知倦山林彼哉夸奪子佩服爛朱金

商丘有奇樹厥生非一朝修根走靈社騰榦擎赤霄拳
局無大用液樛不可彫誰謂非世器終焉托逍遙致身
適有遇松桂寧免樵

吳中大水有負郭田在常州云已漂潰作一首示
公儀

百谷馳東南三江澆吳會積陰漏雲漢涌水翻積塊斯
民既昏墊我稼墮顛沛魚鼈有餘糧郊原靡遺穗餬口
竊自恕矜寡將何賴天道有盈虛吾寧罪于歲救飢苦

謀拙禹稷不可待行矣帆長風因之浮海外

覽古二首

固國不須險用兵不須強域民在所守威敵在所良由
余仕諸戎秦穆警封疆晏子猶在齊范昭識難亡小國
有其人大國豈易當奈何億萬師牧野遂煌煌

天馬出西極由來中國用榎楠秀荆楚乃作晉梁棟遺
材彼興憂得寶此以重伍員楚亡命一旦摧郢衆世薄
事有然申胥得無慟

和聖俞織女無恥羞

織女有恥羞歲一過牽牛暫來已遽往光景不少留會
合一何亟離別一何脩不知靈匹意正使令人愁河漢
清且廣風波無時休寒修古不存烏鵲相為謀理拙心
莫同誰令結綢繆蛾眉坐自老紈扇空悲秋

同獻臣七月七日夜詠牛女

熒煌昭回章婉孌靈匹燕薄霧垂網衣明星綴華瑱潔
身奉君子所幸常顧眷風浪既多艱歲時劇飛箭會賒

別堪疑那能鬘不變願構虹蜺梁與君常相見

觀水

楚山積陰霖百谷盛號怒虎豹亡其曹蛟龍失所据勢
排蒼崖列力與巨石注頃刻浮青天微茫浸高樹茲城
依平原自古北懸瓠

汝南城謂之懸瓠

墊溢安敢辭漂浮實所

懼禹功不可及河伯欲誰惡寧以蛙龜歡姑為下民蠹
築防力不足疏瀉志猶慕安得鞭馮螭從茲萬里驚

喜雨

海上雨初至中庭樹交翻幽人整冠帶喜見雷電存積
潤瀉河漢餘滋被邱原魚龍倘可活鼃黽誰嫌喧稍稍
秋欲變微涼入前軒古人致壺壺吾亦開吾樽御叔小
大夫頗知笑臧孫賢愚定誰是興盡忽忘言

送張氏家姊至丹陽早別

曠夜涼氣早八月風已寒遙雲結層陰白雲被芳蘭傍
徨步高隰怵惕傷肺肝奈何遠別離涕下若波瀾

木鴈堂

聽訟吾猶人安得終日間從吏已可知拂衣未能還道
遙及餘暇苟且寬心顏洒掃延清飈空涼開重關古人
有所處才與不才間持此以自娛將非真隱然

寄題蕭山歲寒堂

伊堂早頽挫松柏亦憔悴常惟摧為薪中塗失蒼翠昨
來始營葺棖桷復高麗蕭蕭青雲翰始有百大意神明
頓來還故老咸歎朝燕得所常問誰救其敝吾家渥
洼駒頗有超絕氣好事能復古愛奇趣起廢後凋甚明

白來者思髣髴此實賢智謀古人貴宣弟仲尼頌子產
其養民也惠召公憇甘棠後世歌蔽芾勉旃崇其業事
足伯父繼

伯父曾
宰此邑

令名與佳樹自可俱億歲

示鄉人陳生

祖母之
侄曾孫

我祖學蘆山潛光玩詩書君家獨先覺一見矜里閭固
有如陳平長貧賤者乎青雲果自致遠鑒驚羣愚鳴風
兆有媯懿占信不誣粲然諸子賢仕各列大夫號稱萬
石君盛事衣冠無聲華輝圖史豈獨榮粉榆外族繼清

高恥為事物拘未嘗入城府奕世風不渝宜有羔鴈求
怪其久闕如君來就鄉賦信足光慶餘郡守勸駕行紫
庭與計俱努力事學問豫章摧扶疎游子懷故鄉矧伊
接葭莩勉率為歌詩尚能念起予

聽府妓歌憶春卿資政給事

南方酒如池醉倒本容易蔡姬緩聲歌清響動雲際惜
哉知音稀此輩自難值曩者東山游一日已三歲人遐
成陳迹興盡失超詣寥寥方外歡獨數嵇阮輩凍雲臨

寒空掩鬱邁往氣引杯亂愁思擊節還拊髀

招數

鑿井不及水雖勞乃無功耕田捨終畝歲暮安俟豐人
當少年時耳目明以聰所為患不能所學患不通患之
不自勉老去逾顛蒙雖復欲自力歲時已飄蓬譬彼陟
大水不能曉西東論爾安可忘我嘗夢周公

朝乘

朝乘日車出暮戴星影還顛冥朝暮中出入咫尺間已

覺素志非更知人理艱
小利專欲速大德不踰閑

雪

楚塞常閑雪窮冬未為晚
欣看朔風過想自萬里遠
崩騰龍沙飛浩蕩北溟卷
勢排炎荒瘴力救南國旱
悲鴈飛何之蟄龍卧終偃
至神亦憔悴爾輩何繾綣
歲陰倏將改天運有必反
慷慨吾何言短衣數自挽

復雪二首

十日三雨雪同陰坐朝昏
幽人感歲晚更覺日月奔
勁

風西北來轟哮動乾坤中州山崑墟四徹皆瑱璠鴻鴈
遊可哀竹柏生僅存念此使心悲何時見陽春志士則
憔悴薄俗安足論鄉里狐貉兒反怪天正溫

前夕盛雷電謂言春和發典衣買春酒歲事亦可悅不
知天難謀信宿更凝冽朝來雪盈尺初計頓乖越吾廬
甘重塞敝褐忍百結豈敢咨祁寒又非慕炎熱陰陽相
交錯萬一成災孽憶昔魯隱公九年春三月癸酉雨震
電庚辰大雨雪春秋書為法其事何照晰曾經聖人筆

下學而上達況此四月間又當季春末願排闥闔戟一
獻春秋說路遠泥阻深愁哉卧巖穴

書堂

客身因旅人未如負舍蝸滾滾荆吳間所居不常家宴
安非吾事但恐髮早華且復一日葺隨時具生涯白盛
爛四壁瑩淨磨疵瑕虛明豁心府永使思無邪愁來莫
與語起就書龍蛇亦足寫方寸放歌快咨嗟苦嫌中庭
窄所生野草花故須種松竹反憶日月遐歲寒與誰共

惆悵終無他

答江丈雨中

繁陰乘炎夏晦色正朝暮蛟龍困雲雷虎豹病氛霧過
時畏昏墊推分縱所遇閉閣空自愁救飢恥無素江侯
卧閭里本自濟時具方與造物遊昔同斯人處作詩破
幽憤恆筆紆遠慕磊落三賢人千秋如面晤道同義相
契未必形影附長謠雖鳴篇因見君子度

九月十日雨中孚先見過園基嘗茶

幸從大夫後而無吏事憂出沐風雨夕閉門松菊秋素
交辱見過意氣何綢繆車騎皆雨立富貴若浮雲園基
紆壯心酌茗當獻酬豈惟鄰里好足慰平生游書籍可
許通水火得所求獨恨雞黍薄無以從淹留我窮若匏
瓜于世良悠悠寂寞守一隅非君誰見收庶幾除三徑
玩此歲方邁莫令子衿詩更作商聲謳

渴雨示府僚

東風破窮陰農者亦望歲宿雪滋已消驕陽更為沴璣

衡運元化律呂導和氣四序宜平分斯人尚憔悴關中
大兵後所向半凋敝荆棘獨至今睠言可涕泣憶昨辭
紫宸從容畫民事焦勞見顏色曠蕩洒恩惠開倉出其
陳履畝奪浮議乃知聖神心獨在舜禹際所憂吏不稱
未足效兼濟安得三日雨滂沱澤厚地百昌奮皆作吾
亦免于戾吁嗟望雲漢冥漠想萍翳交泰及此時羣生

宣終否

某朝辭日面陳發倉救飢及
罷均田履畝之擾皆見許

成冬

富貴抱憂患貧賤苦煎熬居此二者間幸無終歲勞養生賴裘葛卜隱閑蓬蒿既不碌碌冗又不巍巍高炎涼縱所遇寒暑俱可逃竭力供子職大歡對兒曹至人貴真樂名位豈所饗咄嗟路傍子生死堪悲號

卜居謝晏公

燕雀赴廣廈雞鶩就卑棲我生共有託生理與汝齊憂患歷險艱轉徙疲東西常慕蠻與觸所居能自賡哀吟蹈楚郊主人欲招攜卜築煩里旅婦姑免勃谿此邦非

故鄉習俗素所迷頗以羈見忌得安糝與藜下見賢相
仁恤隱逾天倪陰德少陽報眉壽至今圭已當受一塵
終身活濯畦

卜居

清波照華門垂柳拂危軒靜境偏相慰鳴禽時一喧羨
魚還結網引水自疏源嘯傲陶唐世幽憂不可諉

蘆泉

吾山會雨澤汗漫千里秋不如蘆泉水來入城中流經

營萬餘家澄澈去無際我樂與衆同泉能起人意泉旁
宜嘉林時多桐與梓泉間宜美魚時有魴與鯉誰能捐
萬事來我泉上居我欲解章綬從之泉上漁

浮光山人

居山中與虎豹處初
不疑憚有母八十餘

先生方獨往逝與一世辭雖未超雲霞豈嘗顧卑事
親止于適接物能不為谷中虎豹多往往行自隨此是
真人風何必太古時吾欲從之遊自嫌迹尚非寄心道
遙間聊可以相期

初到東平得雨

少服逢掖衣又為梁甫吟
謬膺東藩守似慰畸人心
宣布祇上恩浚明肅官箴
治醇俗易美事半功反深
嘉雨蘇旱苗慶雲結重陰
天將假民樂我以開煩襟
鉅野會百川東山凌衆岑
庶幾緩吾帶一窮登臨

雨中送張六

秋陰蔽陽光雨潦如昏墊
居人鬱無聊游子行可念
方攜一樽酒欲別情不厭
雖無車馬贈篇賦私敢占
人生

遠圖在離索安足慊願為東南風刮日割長焰取觴醉
車軌千里由此漸

攝領審官六日還印長文戲作五言

山野不事事未嘗中繩墨得官筆硯間懶與慢成癖前
日承君乏始親薄領役捶鉤校毫芒簡髮差寸尺自知
非其任良有不可力君誠神仙人那得頭不白絲茲謝
睎跂依隱就閒寂

桐花

一株青玉立千葉綠雲委亭亭五丈餘高意猶未已仙
僧年九十清淨老不死自云手種時一顆青桐子

同梅聖俞送尹郎中監舒川靈仙觀

真人西度關乃祖獨知之強著五千言竦身棄喧卑靈
光無時没人世自超忽上下千歲間裔孫亦清出論兵
復擊劒遠與道同符功名不如意白髮笑桑榆藏書天

祿閣

郎中上所集兵
書詔藏秘閣

卜居天柱山此職無吏責去去何

時還山中醉白雲山下弄流水吾已了損益未知生死

耳聊登千仞巔下視寰中塵更因長風來揮手謝世人
記所居草樹

幽蘭晚已秀新竹直且疎樸檟亦巢禽坳堂自容魚長
日肆炎赫周軒正清虛適心不貴多一畝覺有餘理會
遣孤笑興來味羣書彼何擾擾爾我獨欣欣歟人臣無
懷安吏治猶蘧蘆幸及三年淹庶幾閒燕居

銅雀臺瓦硯

當時鴛鴦夢飛入魏宮來崇構減餘香碧瓦空在哉磨

礪甕新硯洗刷滌故苔但取圭角全何必瓊與瑰

樹下二首

中庭兩佳樹密葉如翠帷擢榦一何高鋪陰被前墀清
風自翩翩正晝無炎曦拱揖在我前我常往參之隱几
旦復暮卷書坐忘疲安知非華屋聊以庇蔭為瑤室隕
帝辛璧臺喪周姬由來滅亡禍不為草野施偃仰更何
顧欣歡方在茲

召公愛小棠百歲俾勿拔仲尼憩大樹一宿輒已伐聖

賢豈殊途人事有窮達出處何可常我身固微末上無
燕伯遇下無宋人孽從容聖賢間得此亦已竊

庭樹

中庭無多樹花盡自成陰熏風吹清和午影還蕭森上
有出谷鳥間關鳴好音下有放言人寂寞卧機心人鳥
各相忘語默不見侵吾廬此最好豈意在山林

送石昌言知宿州

宦情重居內世論輕守藩出處苟自得重輕安足原昔

常怪蕭傅恥乘太守幡，獨多嚴生厭直金馬門。
優游樹風迹，宣布流上恩。何負廷中臣，而貶千乘尊。
石侯古人風，自令薄夫敦。平日不汲汲，左遷更軒軒。
輕舟趣行裝，合符去天閭。高卧可以治簿書，豈所煩我亦羈旅人。
不堪市朝喧，又無適時用。坐自悲素餐，願為江湖長聊復育元元。
子若未北歸，相過識吾言。

題和弟所居桐樹

卜隱謝林藪，考槃寄閭里。嘉樹為我徒，清風濯塵耳。手

披漆園書身擬長梧子窮秋忽感悲埽榻且歡喜

冬晚贈深甫

客游已昨日已復歲月改流光一如此故物紛晦在忽
使中心悲悠悠若浮海相思間何闊此意君當解

公是集卷十四

欽定四庫全書

公是集卷十五

宋 劉敞 撰

五言古詩

效陶潛體

出門逢一士抱書亦南山問其何為爾欲語輒復歎少
小貴詩書志業覲孔顏爾來三十載鬢髮條已斑唐虞
不可待世譽亦恥干寧赴巖谷老行行未遽還其言乃

可感使我再淒然人生歸有命窮達何足言勸爾飲此
酒唐虞在其間

懶詩

分表難強營俗中彌不堪始覺懶亦真功名焉可貪婆
娑玩流光幽寂信所詣束帶愁逢迎燕處倦交談碌碌
史隱間將為茲世慚

菖蒲

香清自足愛味厚非所倫如何缺缺徒反以花為真花

奇不可見舉世皆忌辛誰將擢仙骨願比芝苗珍

登薦福寺山亭

時事如不聞煩襟尚鬱悌高亭一何壯俾我遺外物是
時夏景初竹樹雨飄拂燕雀飛簷楹喧爭互強倔世紛
類如此小大何得失始知絕羣動方外真有佛此地可
終隱不惟謝炎鬱逍遙鞭其後豈恨久蟠屈

九曲池

廣陵春欲歸九曲池先暖積雪未全消流波已全滿宮

城落喬木岸竹排纖簞古事無足悲登臨苦日短

和永叔夜坐鼓琴二首

衆人于五音醜正不醜隨所以匣中琴寂寂少人知淳
和太平風簡淡邃古時得意亦忘言居然見無為非公
蘊真樂此道誰復期

知音古亦少況乃今人乎至和動殊類此則今世無舜
韶舞百獸事可觀于書但非耳目接便自疑其虛誰謂
今之人反不如獸歟大音蓋希聲聲俗或萬殊中孚有

不化嗟嗟乎豚魚

苦寒行

驅馬涉長磧千里徑無草天寒日光淡積雪常杲杲
風裂肌膚狐貉甚魯縞況我被甲鎧寢遲起常早崔嵬
陟高山日落尚遠道人生各有命豈憚事遐討飲冰傷
心骨重研如巨棗義深自最勵身賤寧要好親戚何可
逢功名未自保少年慕壯健我獨貴疎老

送霍邱謝寺丞

吾聞歐公客必皆當世賢衆中一見子始信斯言然緣
衣得意歸笑語春風前輕賫尚方履去影裊翩翩百里
不足仕桂枝淹華年故須多種秫爛醉揮鳴絃

答黃寺丞濠梁雜詠

閉門委餘事久矣卧幽寂忽枉臨濠篇如逮問魚客山
川盡寫做人物多在昔形倨遊自遠善行固無迹吁嗟
相知晚起予遽多益乃悟文字工足兼造化力熒煌淮
夷珠磊落荆山璧他人竭澤求吾子希世得禽微戒輕

彈路暗慎虛擲如何忽在此詠歎生感激

嶺珠荊山漢梁事實黃所

賦也因以
為興答

黃寺丞九月十三日見寄

茲年見二毛
秋至獨多悲
況乃霜露繁
悟彼歲月馳
衡門靜無轍
幽徑荒不治
眷眷武夷翁
傾蓋成舊知
每枉林下步
笑言輒移時
目擊良已久
鳳歌復見詒
諒君倘
佯意當以振其衰

生槐

冉冉庭下槐蒼蒼山中檜臭味久矣殊榮枯莫相待胡
為寓形生曾不異風概擢榦初無根交陰忽成籟死生
詣膠漆幼壯姿姿態本同非不佳末異終恐害吾意造
化巧淫樂為狡獪玩此三公才比之女蘿輩不然世俗
薄苟合耻剛介妄彼特立姿樂附柔弱類誰能極物理
且以嘲大塊陶冶如吾言庸庸亦何怪

櫻桃

東風吹陳根萬木含芳華客愁獨不改浩蕩津無涯朝

光破浮暄鳥聲交加櫻桃此時盛滿樹紛彤霞當戶
仍拂簾參差自相遮日高卧未起顧見驚且嗟此復幾
日繁譬如空中花非無一樽酒玩之到景斜多慮使意
衰悵然奈爾何

摘櫻桃

此花前日時素雪搖東風已驚變濃綠忽更垂繁紅俛
仰物三換歲華終無窮因笑樹下人未悟成老翁磊落
火齊珠參差珊瑚叢贈遠限道路成蹊縱兒童

春陰

朝日送風光宿雲濃不卷微陰助惆悵旅思增婉婉新
花秀且含芳草綠更遠樂賞及融怡春暉未應晚

除草二首

昔歲有壯志恥事一室中獨願埽萬里指麾走羣雄少
壯意更衰棄書學老農羈旅無田園飄如野間蓬徘徊
陳蔡間咎竄見楚風託足不期廣所存一畝宮秋草日
蕪沒荷鋤事兒童歎息念變化古人頗固窮

中庭不踰畝百草何荒蕪綠葉間紫莖薰蕕互相渝所
憐薄筋力豈愛不埽除賢者曾蒿萊吾徒亦何如公侵
藩垣出蔓也自難圖下牀值蛇蟻依隱行鬱紆至使蚊
蚋多不堪匝肌膚古人遺我言芳蘭戒必鋤努力蔑小
惠作詩感躊躇

早發襄城之龍山呈曼叔

烏啼齋前樹促駕吾當西朝從良友別夕赴幽人期方
以會合喜敢曰道路疲予慙昧時利百事棄不為惟有

好賢心未媿緇衣詩

致來速嘗新酒

徒号無與同徒歌無與和徒行莫之友徒語無所破慷
慨一無徒始覺從君過欣聞酒新釀堂有佳客座歡從
尊疊疊醉聽冠巾墮庶可效名士因君讀楚些

日醉

犀首從橫時無事猶飲酒我生太平際日醉亦何有太
平多賢才臺閣固其藪濟世圖功名汲汲常恐後我寧

樂自放甘與物俱朽顧惟人間迹澶漫獨已久智謀乏
施設筋力倦奔走幸為朝廷知而免職事守人當自量
度快意安所受何能強絕檢希世視自負晶熒流霞波
泔淡白玉斗歡來無虛席嘲笑命賓友殘冬雖餘幾自
足數開口浩歌迎春風安用獨醒叟

寒蘆

雖居江上城不識江邊路故移蘆葦叢粗慰江湖趣翠
華侵硯席疎影入牖戶歲寒待爾共好尚與時迂勿以

比蒹葭蒼蒼瘁白露

和兩府諸公馬上作

富貴信多士況乃主恩深
京洛多風塵冠蓋自成陰
片言代拱壁一顧溢千金
嗟我固貧賤處俗謬浮沈
咄咄人間世俯仰媿山林

和永叔十九韻送魏廣

信陵貴公子仁義不掛口
猶有三千客名聲極高厚
而況賢者門四方所奔走
豈無青雲士磊落照前後
我雖

非其人慕用意殊久差池混出處百望乖一隅羈旅陳
蔡間忙如喪家狗擔簦始自致傾蓋許白首中堂陳詩
書高會置樽酒豈惟聽餘論復喜識賓友魏侯希世珍
頗為平生舊他時恨契濶並生喜邂逅危冠切浮雲長
劍掛南斗同志此莫逆孤遊信無負切磋變新巧綵繪
飾餘醜自謂當窮年如何復分手士生得所師文學致
不朽吾衰莫自力子壯諒何有當取天下名還為生人
壽

遊龍山

孟公乘興出必造龍山頭回望默不言夕陽始還輶千
年雖悠遠此意故風流咄嗟無知者寂寞空荊州霜風
蕭騷晚楚水荒涼愁安得款段馬往來時獨遊

放鷗

上天賦爾才若不受羈紲失身偶見獲羞與家禽列秋
風半夜起鴻鵠兩飄瞥物生各自適聽爾歸寥泝白雲
入雙眸尺地肯自屑慎勿逐鷗爵

缺

原本
二字

不足絕不過

倉廩中朋黨為偷竊鳩鵲最堪憎擅使芳草歇勉力霜
霰期方為鳥中傑

鳴蟬

芳草久已歇星火奄向中日暮玄鳴蟬歲華坐將空輕
舉塵壤外逍遙神仙同豈伊感時節悲嘯臨長風夕露
鮮餘潤炎飈成蘊隆清虛浪自足高飢亦云窮

和聖俞十二韻

處世誠碌碌白髮生滿頭所以不自慚數從長者遊醉

翁名世者事業晞孔周獨立千歲外邈然已難儔韓范
青雲姿奮飛起西州徘徊霄漢間下視輕蜩鳩詩老最
前輩名聲三十秋篇章被海表豈獨魯與鄒今我親見
之執鞭乃所求何況登其堂舉觴預獻酬清談破羣疑
嘲笑寬百憂以此捐歲月吾生同悠悠

宿綠溪

雲昏江水闊兩淮不可測山邱望亦迷馬牛豈易識高
帆乘長風俄傾屢欹仄未知所趣向稍稍萬寓黑近津

見蘆葦其外水正白操舟投其間宿鳥俱闕易水深不
可纜叢梗以為力蚊蚋秋尚繁不眠坐通夕中宵風逾
厲潮水相蕩擊安得似人者警欬在我側天明啓牕戶
願見白日色莽蒼暘谷間竟為霧雨隔追觀宵征處波
惡生悸惕絕糧非陳蔡從者亦悽惻

如意臺

冷冷清池水汎汎不繫舟興來可獨往興盡自難留留
無淹回責往無進取憂世人共擾擾真賞空悠悠章華

楚人困姑蘇麋鹿遊君看如意臺乃知賢者謀

閔雨

長夏炎氣隆高田劇焚燒惜哉淮海卑無力能沃焦起
顧郊野間離離悉苞蕭日夕多狂風飛塵蔽招搖誰能
起蛟龍雷雨蘇宿苗眇然坐自想幽意增煩歎

和過騏驥院觀馬因飲李氏夜歸復與江謝會于
敝居

子真王濟徒愛馬有馬癖每嫌驚駘衆未覩千里格竭

來飛龍廐一一數白黑始驚麒麟骨秀出無與敵旗旄
亂雲霞鼓吹喧霹靂從容看回旋感激私歎息此當逝
崑崙上與天無極奈何局軒陞終歲老羈勒主人貴公
子埽榻多命客聊欲寬其意無為稍戚戚珍羞雜水陸
清酒漾金碧嘲笑心目開留連日已夕歸來興不盡駐
馬問所適知我方會友投鞭遽登席貧家竟何如脯醢
之餘力歌舞復無素兒童強敦逼多君平生懷不與貧
富隔歡來亦酩酊俛仰愧三益

早行

雨息風亦止落月猶在天舟人相呼起稍出蘆葦間暗中各紛拏四聽聲正謹開戶視所從大江自漫漫衆星若連珠累累浮深淵津涯杳難知勢與天地寬俯見舟楫微萬牛一毛然虎豹嗥岸傍蛟龍浮其涎兢兢抱危懼忽忽忘食眠人生誠多憂況乃行路難

重陽日得景烈送酒

歲晚見黃菊悲秋空復情故人豈知我朋酒適平生舉

杯遠相屬目盡歸鴻聲醉眠東籬下此亦淵明情

和焦生石字韻

我惟一逢掖入為二千石聲迹不相同禮貌謂誰敵既
許游藩籬又喜升宴席酌酒澆礫魁賦詩聽警策朋從
常苦少佳節古所惜既醉忘形骸笑言俱莫逆使公貴
且壽富有貧賤客

寄隱直

會短別日長愁多歡情少古來人間世于道同擾擾我

髮日已蒼我顏日已槁離憂固如此四十未應老誰能
跨浮雲相與成莽眇吾子心莫逆庶當悟意表

旦日城東渡汝水與鄰幾飲別歸作五言寄之

繁霜墮衆木朝光破初寒游子侵旦發隱忍行旅艱走
馬東郊門別愁莽無端川長不可厲泛舟觸波瀾相及
墟落遠解驂請盤桓班荆道路側酌酒還據鞍殊鄉閱
人多浮俗見子難結交形骸外生計出處間江湖天一
涯冰雪歲欲闌昔賢往不反子陵與伯鸞東游信不惡

相望終永歎

寄深甫君章

爛漫十日飲未快
遠別情醉魂幾時醒
直見潁水清前
歡絕莫尋離念紛更盈
車騎暫休汝賞晤得時
英披襟
兩相照話言僕屢更論
史既衮衮說經亦鏗鏗
一觴亦
一詠樂事真相并
會合固難常我獨嗟
南行回首念前
好感物非嚶鳴明發
成寤歌勉勉趣遙程

寄裴吳江

王喬一雙鳧乃是尚方履誤逐閭閻風飄然太湖水湖
水連天涯茫茫湛清輝秋來興不盡似欲都忘歸玉疊
嶺如雪碧壺酒若澠醉輒問左右何如張季鷹君乃蓬
邱人神仙有名籍不應自放浪久為塵中客我頃卧廣
陵西風見白髮八月觀海濤壯心謝超越因欲解印綬
從君五湖遊功名非所及為具鴟夷舟

寄贈獻臣

龍興幽泉中溶雲自潛飛氣還大淵下灰籥先察微氣

應不必邇至誠神與歸嗟予接休德志合無纖譏譬諸
死灰然安事旦夕違胡為久相越書問月增稀

五言寄江丈鄰幾時往尉氏未還

終日相與居豈知相得懽出門一分袂乃覺攜手難西
風過浮雲急雨生早寒清秋令人悲茲遊何當還歲月
游將晚念君尚加餐

寄深甫

往卜頤上居徒愛頤上人巢由節並世管鮑必相親而

我與夫子阡陌東西鄰正可白首遊豈計中道分人生
莫自必一別俄六春入踐西掖垣出乘兩朱輪佐時乏
明畧來往徒紛紛上愧洗耳翁下慙圖霸臣念欲投劾
去結茅復從君攄我宿昔意寄聲謝水濱

寄楊忱明叔

君有湖海氣沆碣凌斗牛遠持一卷書濯我千歲憂大
音不衆合至寶非暗投感激移人心汎濶使涕流俗譏
陳元龍世乏劉豫州安得排羣兒卧君百尺樓

雨中寄徐二

北風吹飛雨中夏變早寒浮雲滿天地坎井成波濶秋
興集我懷旅愁散無端陽光旦自匿后土何得乾嗟君
貧非病所寄瓢與簞陋巷無雜賓商歌激清彈甚願裹
薄飯相從饜朝餐亦思造暘谷相與晞朝冠力弱泥潦
深乃知行路難

論交

張陳父子游乃為白刃仇蕭曹平生歡亦作睚眦交

合名利間安得無後憂商山有四人衰老俱白首但食
巖谷芝終身不相尤未必能獨賢苟云無他求古稱結
交難成敗視此由作詩告同心市義誠足羞

秋霽醺北軒

北軒屬秋霽曉見風葉零置觴命賓友環坐飛淥醺遇
適輒獻笑放言豁中扃兀然不省醉起見天上星勉強
相勸引我謠子宜聽幸無兵農憂稔歲蒙休寧讀書業
文外惟有醉不醒世途若波濤富貴乃浮萍置之無可

稱視彼鴻冥冥

送楊十七祕丞知瀛州河間

洪濤翻金堤冀州變泥塗哀哉百萬室所憂半為魚流
穴接道路呻吟交里閭若無慈仁長安使疲疹蘇子在
新密時治聲溢西都大水無麥禾閔然若疾痛不忍使
者求建言解其粗邦人喜更生老幼歡以呼繩墨制奸
吏弦歌訓諸儒復新卓侯廟慕用已不誣今者河朔行
豈其易然乎彼將譽所試況子材有餘但恨治者小百

里為區區割雞用牛刀孔聖所歎吁賢者必愛民民活
心乃愉幼學長行之因為聖人徒位下非所恤勉哉寧
君軀

送梁山軍徐祕丞

鷓鴣一何智俯仰人間遊落實不給視去之畏少留高
賢在天下富貴如浮雲得失不概懷損益寧所憂若人
古已亡今復得徐侯詞科二十載朝籍方見收四海厭
名聲廟堂多革儔後時不自失觀化君悠悠入辭未央

延遠收荒山陬去矣成獨往豈嫌時俗羞

東鄰花

卜居非卜鄰適幸鄰花發照曜東軒東暄然二三月露
香送清吹晨艷開繁雪稚子戲牆根鳴鷄出林樾我來
奔羈旅疑及武陵歛欲訪竟無從空觀對寥寂為人惜
俗事鄰里多謝絕獨爾可相親芬芳未應減

公是集卷十五

欽定四庫全書

集部

公是集卷二十六至
二十

侍講學士_臣羅國俊覆勘

武英殿纂修侍講_臣陳嗣龍

欽定四庫全書

公是集卷十六

宋 劉敞 撰

七言古詩

憶洞庭

少年慷慨輕遠行出入楚越多所經每令百川盡衣帶
獨憶岳陽觀洞庭方輿沈潛似無地倚葢回還徒見星
始疑上帝限南北恐有漏澤連青冥西風八月氛霧收

曠宇千里令人醒苦為外境相誘掖欲棄塵世浮滄溟
當時發狂頗自怪真擬乘興攜湘靈至今局促不如意
坐視歲月無時停涼秋滿眼更多感回首尚覺君山青

聞鴈

去年聞鴈江湖邊爾時異鄉望白雲今年鴈南身更北
可憐送目懷居人我生羈旅自南北鴈飛何為亦遠役
浮雲滿天我無翼相與因風寄消息

庭楸

中庭長楸百尺餘翠葉掩藹當四隅晨霞夕日自相翳
並坐可得千人俱憶昔河決鉅野溢定之方中作宮室
當時魯人始種此還賦衛風伐琴瑟春華疊疊六十年
高榦錯落摧寒烟悵望空隨衆木老中舍至音無與宣

送張公往建溪

秋風駕流溪水急君帆胡為破烟入仙人近約武夷會
漢祀山頭羽旄立羣山叢叢野波綠君纓無塵見心曲
江淹夢筆靈有餘君歸何時佇盈軸

曉起

棲鳥未動清漏殘
寥寥空堂生早寒
相重樹色如潑墨
欲落月來成渥丹
市聲嘈嘈入人耳
自笑帶星還若此

防秋

秋霜折膠邊馬壯
邊馬窺邊怒邊將
游騎夜入燒回中
烽火朝傳過隴上
關東行客關西來
欲說兵形先噉哀
長戈不能斷右臂
壯士無過委黃埃
歲輸繒帛顧何益
匈奴反以馳荆棘
安得連山如長城
遍限中原卻蠻貊

打魚

南人登魚作腰臘清潭數里奔舟楫層冰始解川氣和
百尺分明見髻鬣大網如雲遮要津須臾牽網迴水濱
地高勢蹙漸逼窄忽復逸出黃金鱗釣叟篙師共驚駭
失聲奪氣俱逡巡素魴赤鯉不足數棄擲千萬如埃塵
豈知異物通變化暫網中還有神

戲題西湖中魚

育育水滿湖中有千金魚浮沈得意似太古不畏網罟

畏鷄鵒綠蒲欲齊藻初密紅尾差差映朝日疾雷驟雨
人莫知潛有蛟龍取之逸

養魚

鑿池不容數斛水養魚才勝十餘尾可憐出沒萍藻間
還如汎澹江湖裏君勿笑坳堂坎井無遠期假有神物
君不知風雲變化在倏忽隨衆幽潛聊爾為

和永叔食糟民

歲豐飲酒衆同醉歲饑散糟民亦濟乃知酒醑在官為

長策上可足財下均利黃頭稚子白髮翁哺糟相隨塵
土中豈嫌身居犬彘後還喜生值恩施豐翰林仙伯屈
主諾憂民之憂樂民樂禍階六筮不易救惠及連城自
云薄周公以來千百年希世俗儒玩糟粕排斥酒誥終
莫用感激長謠豈虛作恨公未為富民侯此等區區豈
所憂

漁翁

白頭老翁披敗蓑求魚終日罩淮波波深水濶望不絕

網目雖繁能幾何大魚鱣鱣入淵底小魚鯢鯢登網裏
手輒足趺吁可憐何不為網大如天

苦雨

東風十日不肯回濃雲猛雨無時開紛然萬瓦垂組練
忽變百里吹塵埃河魚無翼蹈平陸水鳥哺子升高臺
羲和送日不竟夜陽烏翅濕方摧頽腐薪數吹不堪濕
靈井已滿無用汲大衢泥潦安得出敗瓦漏缺端愁入
街頭紅粟更騰踴歲晏敝裘方綴緝黃花熒熒獨不憂

悵然為爾臨風立

麻黃州送李斯石銘二十一字

麻侯昔為萊子國海濱漁人獻文石云是秦始皇帝東
巡碑二十一字李斯迹桑田變海岸為谷此石亦沈滄
海側浪翻水轉石段空偶存數尺非人力文章雖傳失
首尾猶與史記無差忒字形訛缺非昔時蟄龍病虺相
排迨念昔屬車八十一氣如虎狼食中國方士獻策通
神仙諛臣奮筆夸功德始皇未死名已滅秦地初分石

皆泐邇來似覺天意然欲令後世羞其惑君不見夏禹
九鼎傳三王末年乃隨殷社亡時平往往暫一見龍文
玉鉉曾無傷聖賢作事宜萬代事非聖賢多立壞

畫草蟲扇子

周南草蟲但書興爾雅蟲魚浪多證豈如紈扇裂冰霜
畫出肖翹皆絕勝蠅蠅蝶輕去塘娘狷同類殊名悉相
應毗陵老匠含天真獨得于心非氣孕牂牛落筆殊偶
然秦女驂鸞不相稱因筆力尤天下一借微軀聞萬

乘

聽江十誦食鱠詩戲簡聖俞

長安貧客食無魚，浩歌彈鋏歸來乎。主人聆歌知客意，
酌酒買魚相與醉。一魚百金不可償，操刀作鱠揮雪霜。
鱗分骨解珠玉光，舉盤引筯絲線長。楚飯彫胡香且潔，
吳羹入口如沃雪。主歡賦詩客稱壽，裂簡搖毫落寒月。
我亦羈旅秋蕭條，思鱸回首江漢遙。過門大嚼取快意，
詠詩忘味如聞韶。君若乘風駕滄海，更鱠長鯨且相待。

積雪示張翁

冥冥同雲晝如墨十日江城雪三尺騏驥長鳴向朔風
鴻鴈悲飛困雙翼此時窮巷多泥塗念子衰年少筋力
時俗反稱少壯賢丈夫動與飢寒逼乘興能枝筇竹來
煮魚溫酒澆胸臆

苦雪

積雪冥冥春不淹流光驟去十之三根拳枝折物可念
衣敝履穿吾自堪天樞回環錯寒燠地軸開闔差朔南

乾坤密移世莫測安得辨士能劇談

雪夜留二三客飲

高樓鼓絕昏鴉宿疎簾暗幕開明燭雪風振海夜未央
酒池無冰春更綠迎年送臘醉莫辭回環四序長相續
奉和聖俞春雪

一日朔風三日雪冬來嚴凝春復結不知長此終安窮
芳物差池且三月雷公怒號何淬嗟欲起草木呼龍蛇
可憐慘栗奪氣意正復憔悴哀泥沙紫宸放朝車馬息

鄰里謝交門徑寂解龜換酒聊自樂浮雲蔽日殊未極
同聖俞十二月十三日喜雪

楚越氛氲雜炎瘴憑陵中州冬益壯天兵橫厲江湖間
殺氣冥冥逐飛將南風不競寒律回暮雪遠從閭闔來
雲崩濤涌天地閉埽洒萬里空塵埃公卿入賀陛下聖
海神來朝軍事定

和永叔喜雪

陰風觸物生晚勁積雪經旬戲春令氣排水國吁可駭

勢覆山城力誰競
繽紛乍逐飛霞奪
慘淡仰見浮雲定
稍并日夜明相續
欲亂玄黃色交映
邱陵迤邐增更高
市井喧卑聽逾靜
包荒含垢似天德
履素居純近民性
可憐佳境浩無極
非有雄辭豈能詠
忽憶避地歌其勞
攜手驅車及寬政
邇來盈尺亦何有
高卧閉門方自慶
矧占豐歲宜九穀
重抑驕陽毆百病
龍蛇在蟄鶯在谷
與我俱欣四時正
新詩翩翩摧古人
汝陰太守明廷臣
侔色揣稱笑流俗
與民樂賡陽春曲
由來曲高和必寡

況我才居郢人下

去年對雪一首贈江十

去年對雪本憶梅今年看梅更憶雪
繁香浩色他日時誰為年年劇胡越
乃知古來人間世十常八九不如意
況我與君羈旅人別多會少誰復計
閒來看梅取一笑對雪更作明年調

月夜

清風卷雲天雨霜衆星滅沒月騰光
紛紜六幕含蒼蒼

瑩如冰壺察毫芒太虛真人河漢旁攀援桂枝曳霓裳
紫貝為闕白玉堂珠筵瑤席羅羽觴倚風微吟聲抑揚
揖我起游謂我臧左驂蛟螭左鳳凰倏忽萬里天路長
塵埃下土殊茫茫樂如何其樂未央

依韻和永叔即席送擇之出守陝府

驪駒在門且勿喧主人留客姑進酒一時轉盼已陳跡
千里相望更何有祖侯聲名二十年天下英豪共奔走
誰云白髮寄郎曹更喜朱輜入吾手揚雄天祿就寂寞

召伯甘棠變枯朽乃知人事不如意自古十常有八九
男兒何曾計出處時運由來有奇偶莫嫌青雲晚著鞭
會取黃金大如斗君能食飲和天倪餘事無可付莊叟

飛輪團扇歌

赤雲燒天天欲焚深堂如炮井如鎖肴乾不食酒具陳
君胡愁嗟念南熏主人白羽奇且新捷逾輶膏機有神
飛廉舒御旋相奔晻藹翕霍娛坐賓衣襟飄飄恍凌雲
何用御風絕埃塵主人顧嗟顏色顰安得救暍通下民

羊角扶搖非敢珍願使大鵬離隱淪上客捧觴起為賀
君宜千年位卿佐

雨過前軒偶記

江南羈客懷鄉墅曉起前軒對零雨清波滿目如鑑中
遶岸高松十餘樹砌旁芳草似汀洲巉巖殿角飛紅樓
沈光倒影入浪底宛是若邪溪上頭薄霧疎烟迷近遠
水色誰能辨深淺忽驚謝去塵中游不知正自居京輦
何人草服倚長松迴頭誤問釣魚翁眼前景致偶相同

宣異仙術遊壺中

贈才元學士

家貧自秣馬賜書使者至言之上
上以語丞相就職而拜廣安守

待詔先生窮巷居簞瓢屢空方晏如自操井臼秣羸馬
卻整衣冠迎賜書王人駐車久嘆息天子聞知動顏色
飽死曾不及侏儒牧民會肯輸筋力詔書朝出蓬萊宮
繡衣還鄉由上哀君今已作二千石亦復將為第五公

題梅尉春波亭

層欄壓湖春水碧日照高穹同一色東風引浪飛魚鱗

極目傷心如楚澤茫茫白芷連茝荷倚沼畦瀛遙望多
官賢與衆共其樂漁樵日暮常經過君家德祖吳門子
棄職從仙如脫屣此中吏隱人不知且濯君纓洗君耳

吳宮

吳兒歛鄭女舞彩衣姣服垂楚楚姑蘇臺高春日遲急
節新聲鬧鐘鼓美人歡醉捧瑤爵君王萬壽長如許吳
宮四面盡山川越兵那得到城下

陰山女歌

按伴副使知
制誥馬祐事

種玉不滿畦種花易滿枝王生寄石自有處花飛隨風
那得知嬋娟翠髮陰山女能為漢裝說漢語春心未知
向誰是夜彈琵琶淚如雨赤車使者過鳳凰閣中一聞
先斷腸碧牕鎖烟未容去侍兒密獻江南瑞鵲飛上天
星沈海人心不同事隨改翦環洗妝許君老百年如夢
情終在妾乘油壁郎乘驄西陵松柏墨色濃新歡未已
舊愁起水流曲曲山重重周周銜羽鶴比翼天生相親
人豈識雖不及清路塵猶當作山上石

遷南行

甲申十二月桂陽叛蠻
平遷其種于京西諸郡

伏波將軍昔征南功業雖壯身不還曾出封疆鑄銅柱
竟留種族依荒山君不見如今聖天子埽蕩妖巢悉內
徙雕題來作冠帶民鼻飲翻宜伊洛水此功一成萬世
寧五嶺三苗長坦平

寄王二子直

鴻飛輒上天魚躍還入淵故人去我百里餘我欲附書
無由緣俗間離合誰得免心雖欲近身逾遠少壯相歡

長年悲自恨今為丈夫淺

夜寄獻臣

同居汴水上自與君居隔月出城頭人盡歸思君攜手
獨不得興來狂歌無與賡白雲時向望中生城外明月
未應減期君對舉黃金觥

和永叔鳴鳩詩

晴鳩謹求雌雨鳩鬧逐婦天地有晴陰嗟爾何欣復何
怒柔桑如雲春暮時吳蠶半眠紫葢肥食不過數粒寢

不過一枝婦子相安可以老何用汲汲合且離雷公號
呼風伯舞天僭之權作霖雨可憐汝愚終不省反室于
怒誰哀汝昔人惡爾巧令人笑爾拙巧不得近瑤臺拙不
能保家室爾巧爾拙非汝情天機回闔難自平世人假
爾推陰晴

秋蛩

促即復促即秋蛩一何力不見機杼巧但聞日夜織霜
隕木落天下寒嗟我婦子衣裳單大鈞萬物各有在爾

獨憔悴使人歡一鳴復一飛秋堂燕將歸四時自興歎
天道不得違憶昔春風和且柔畏人來入人間游鷹隼
橫厲自茲始索寞分散還可愁

三瑞堂

甘露被草朝陽易晞池蓮並蒂及秋變衰獨有長松連
理老益壯十年百年仍附枝昔來一物足為瑞何況三
異俱稱奇吳中衣冠不勝數天意自與寧馨兒露乾蓮
死不復見正以青松并驗之凱風孝子嘗悲思三荆兄

弟傷分離此家遺風五十慕物理推類誰能欺到客為
爾俱題詩

聞轆轤

轆轤復轆轤日夜聲相續長綆無已時深泉變空谷君
不見開闢至今千萬年斗樞坤軸相迴旋河漢西流亦
不息見爾滄海成桑田

過王氏弟兄

出城問窮僻負郭正瀟灑主人著書長閉闔佳樹當門

宜繫馬下馬上堂還讀書新詩古琴雙起予昏鴉棲雞
欲斂翼興盡將去猶須臾徒見城中軒冕客不如吾人
一縫掖安得茅茨同里居子在東阡我南陌

同永叔贈沈博士

我不識醉翁亭又不聞醉翁吟但見醉翁詩愛彼絕境
逢良琴上多高峯下流泉後有芳草前茂林玄猿黃鵠
翩翩其悲鳴兮白雲翠靄倏忽而陽陰此間真意不可
盡未遇知者猶荒岑醉翁昔時逃世紛戀此酩酊遺朝

簪心雖獨醒迹彌晦舉俗莫得窺浮沈邇來十年定誰
覺獨沈夫子明其心寫之絲桐寄逸賞曲度寥落含高
深絕調衆耳多不省醉翁一聞能別音乃知精識自有
合何必相與凌崎嶇伯牙鍾子期目擊意已歆蓬萊三
山蕩析不可見惟有水仙之操傳至今安知後世萬千
歲此地不為水火侵但存君詩與君曲雖遠猶可期登
臨沈夫子與醉翁斯言至悲君更尋

六月六日自城北還過深甫避暑

熱不就惡木枝渴不近盜泉水自古有成言念我還如此愛君井源百尺深愛君庭樹千里陰相知豈計一飯報長嘯聊為猛虎吟

得蕭山書言吏民頗相信又言湘湖之奇及生子名湘戲作此詩

吾家千里駒氣與齒俱壯去年射策雄東堂今年調官在越上指揮小吏遣簿書笑語不廢才有餘清酒肥魚宴賓客時時騎馬臨湘湖湖波無風百里平人道官心

如此清居民愛尹氏為字

韓子為縣百姓生子皆字韓

令尹生兒湖

作名家家祝君多男子越中更有餘山水

翦楸葉詞

涼風天際來拂我階前樹稍驚枝上禽復墮葉間露兒
童畏我逢秋悲刻葉作花矜歲時祝我宜秋勸使插未
能免俗復爾為鬢邊二毛殊不惡淮南何須傷木落

寄書

十里一反顧五里一排徊悠悠三千里莫知我心哀客

愁紛無涯歲月忽如擲人生莫自料皓首豈易測節旄
未落歸去來天遣春風隨我回入朝寧食建業水還家
卻賦南山雷婦能秦聲妾趙舞稚子可使行酒杯急須
為樂娛日夜何事憔悴淹塵埃行矣乎歸去來

答金陵使君答王待制見寄雜言

阮公青雲器寓意必豪縱西臨廣武寄一笑英雄紛紛
競如夢有時不能平途窮即長慟仕哉詠懷篇千載共
悲諷金陵昔為帝王居氣象蕭索無復餘長江連天水

東注臺城髣髴存
邱墟主人文章謫
仙老感古能無激
懷抱作亭正得山
水勝登臨更值風
月好賓客滿堂絲
竹悲古今風流自
一時君家夷吾雖
有慷慨語快意未
必如君詩淮水東
流千萬年此亭方
與淮共傳念君歸
老廟堂上未負賡
歌留北山

古城

古城何巍巍古墓
何累累生遊市朝
死田野從古到今
無免者城荒卻為
狐兔宅墓在他人
種松柏伏羲以來

三萬年此城此墓幾變易誰人聽唱野田詩能令君悲
亦不悲

築室種樹

撫劍欲遠適舍旃輒復息四海廣大身正孤東西南北
頗同役築室種樹反開門閭里小人哀王孫丈夫委順
故任俗餘事悠悠何足論

風花

風花不自知高下逐風飛故有多情處時來點客衣仙

源應在晴溪側弄雪吹香不忍歸

種蓮

雨餘池上清且滿浮萍漂漂綠蒲短主人惜此芳意薄
移藕丁寧不辭遠南陂芙蓉少人識疊築重房無俗格
託根得地今始逢西風白露為君容

公是集卷十六

欽定四庫全書

公是集卷十七

宋 劉敞 撰

七言古詩

朱雲

志士不忘棄溝壑勇士不忘喪其元
伏雞搏狸狗襲虎感激只在精神存
漢朝陵替外戚盛五岳振蕩三辰昏
臣強主弱上不悟庭中唯唯誰能言
朱生節義邁金石

面劾不避師傅尊願求上方斬馬劍誅一厲百清其源
天威震怒不我受利刃接頸雷霆奔當前折檻色不變
命在頃刻誰扳援昔時仲尼魯司寇七日行戮端乾坤
嗟我此生心不就冥冥后土埋其冤漢家社稷變王氏
張禹虛蒙師保恩卓然先見在物表佞臣敗國誰復論
我願乘雲款天閭巫陽掌夢招其魂立朝蹇蹇辨邪正
無復姦諛開偉門

金山廨院

門前松響亂頭上壁上江圖流眼前松聲水響兩不辨
似有疑非心悠然安得乘興浮輕船

潘道士

上清宮中老道士曾從先皇去封祀山頭候夜窺火輪
汾上掊鉤出金耳雲成龍虎當翠華豐隆前導清泥沙
萬靈扶駕百神護雜沓仙侶堆雲霞黃衣羽客十有餘
多能引說軒轅初漢廷儒士議迂濶天子自用申公書
金繩玉策埋石壤神光夜見連空虛天心報貺宸意喜

白茅玉印旌其徒帷宮賜席接虎幄待之如賓盡誠慤
中書祕術使之觀神動精搖易飛躍鼎湖龍去何超越
日月茫茫自奄忽龍髯墮地秋草生人世霜華滿頭髮
遇海舟

秦王好神仙東上琅琊臺蛾眉綠髮五千輩去乘長風
歎蓬萊此時秦人海旁立生別死分不敢泣但見高帆
雲中沒野鳥悲鳴為翔集過海舟何時還火焚荊棘空
驪山

猛虎行

陸不辭虎豹怒水不避蛟龍爭衆人亦有命大賢豈虛
生千歲猶須臾四野如戶庭解弓掛扶桑脫劍倚太清
騰身騎日月萬事如蚊蚋貧賤有固窮慷慨激中情炎
火燎崑邱乃知白璧精雪霜沒衆草高松獨青青甯生
歌車下戚促兒女聲時至乘化遷運類與物冥震雷不
經聽芥蒂何足嬰君不見賈豎競錐刀蚍蜉利羶腥何
如乘雲御氣遊咸池長嘯濯我冠與纓

雷陂勸耕作雜言

此陂蓋江都宮之地吳王鈞臺在其旁先時民三十家耕其中

後強為吏所奪廢不耕者十餘年矣予按地籍悉召還耕者使縣大夫授之地如其舊

君不見江都宮昔時何崔嵬下臨雷陂水前踞吳王臺
臺傾無餘級水竭空塵埃隋人已曾顧此長嘆息今世
更為隋人哀乃知天地間一盛亦一衰但從伏羲已來
三十餘萬歲未有書契勝言哉堯桀是非何兩忘我欲
勸人闢草萊種稻水一方藝麻陵四頽爽鳩之樂非我
有聊獨玩此田每每未知百世間更復誰當來且欲及

閒從賓客省耕訪此時徘徊

／ 碧瀾堂

苕溪之水搖空山雪溪波流無日閒上有高堂蔭華宇
蒼翠凌亂軒楹間異時客心樂真曠白鳥鷓鴣期往還
解纓欹枕便所適焉能復問居夷蠻嵐光稜稜聳屏幌
水響濫濫搖瓊環正如明鑑發塵匣萬象聚眼醒容顏
秋風已高白芷老編荷制蕙文爛斑魂清魄爽弄明月
洞庭跬步尋非艱神仙有無未可信物色但訝非人寰

瑤宮紫府竟何若茫然遠想令人潛長竿獨繭可以老
安用馳獵盧重鑠沉復邦人講文墨風雅不待仲尼刪
丞相詞章狀元筆犖犖神裁無由攀嗟我胡然陷塵滓
不能追逐鷗白鷗發狂醉問二三子吳溪釣碣何如頑

陳丞相詩王狀
元書刻于石

灘陽歌

梁人猶為灘陽歌隋人水調能相和梁人池臺已平地
隋人岸樹空嵯峨梁人隋人去如水水聲日夜流不已

張巡廟前春草生
里人尚識將軍名
國讎已滅心不死
憤氣半夜凌機槍
丈夫節義豈在下
願為長劍剗長鯨

馬蹄硯

巴巫之山足奇石
氣含秋雲如黛色
君家寶硯安所得
圓為馬蹄螢為璧
宛城路阻流沙長
中國久絕真乘黃
惜哉逸足世不識
所存一迹猶形相
鄙夫雖非伯樂比
偶見裏蹄識千里
願君不惜勤示人
倘有驂駟免空死

天中山

茲山陂陀但盈尺其下盤根乃無極勇如共工莫可觸
力敵愚父無能役開闢以來傳至今形勢雖小當天心
斗極回旋未易測日影短長猶可尋石旁陰穴穿洞府
中有神物為之主禱祠往往見光景曠旱時時作霖雨
由來邱山貴靈不貴大正復陂陀亦何怪

岸旁倒樹

滄洲老樹生幾秋榦如墨龍根紫虬雨水摧激勢突兀
天矯出飲滄江流危不見持顛不扶蕭蕭生意令人愁

豈無耕夫與過客暫時憇爾行則休西風八月海水飛
枯槎昔曾凌斗牛恐爾漂零未終極掛帆欲去仍回頭

黃寺丞井上桐樹為雷所擊

君家井泉深百尺上有高桐十尋碧鳳鳥不至獨何憂
蛟龍深潛莫能識迅雷烈風來擊時地軸翻倒海水飛
正直摧傷豈天意繫不成琴瑟未遲

送人之會稽

鴈鴛羞逐巢上雛騏驎恥隨廐中駒由來俊邁惡羈縶

子獨三年留上都江南秋風鱸魚美庖餽炊粳東入吳
腰間蘭佩垂左右船若神仙人不如會稽古來好風俗
嚴助買臣相繼驅近來太守廷中臣拔賢好善當朝無
子今東去懷自許解榻非君尚誰與剋日飛聲動洛陽
聽君如聽雷門鼓

題深甫所種樹

中庭卻埽無餘地憐君種樹還有意重陰覆屋千尺時
徙坐讀書殊可喜似君秀骨不易攀當援桂枝星漢間

豈能玩此便自老塵俗紛紛聊閑闕

雷氏子推迹石鼓為隸古定聖俞作長詩敘之諸
公繼作予亦繼其後

結繩既亡書契出文字變化尤倏忽太山七十有二代
遺事昏昏萬無一岐陽石鼓起晚周宣王之詩史籀筆
天下金石凡幾存此當為甲彼皆乙體勢鳥迹雜蝌蚪
詞章車攻與吉日六書既廢小雅缺能使兼存此其實
韓公昔嘗歌感激若弦周詩播琴瑟雷生今復隸古定

如破魯璧傳簡帙道之難行乃若茲二千年間能事畢
先王親用必貴本流俗玩文因喪質此雖于今似不急
豈不班班見儒術藏之天府自其所大訓河圖亦何物
會稽羣玉久冥冥漆簡韋編尚髣髴昔人雖死名不朽
智者能為巧當述太學先生事起廢誦此勤勤救埋沒
會令永與天壤傳不比酒誥俄然失

城頭烏

城頭月出天正白衆鳥驚飛啼夜色枝高風多露新滴

畏聲惡影不能息
愁人感之援鳴琴
拂弦成聲淚沾襟
嗟爾一生八九雛
游翔不過東西林
白頭反哺無所恨
桓山分飛獨何心

驚鳥

北林風多丹葉稀
棲鳥畏月夜中飛
哀音亂發不自得
孤影履翻無所依
作巢欲高避彈射
誰道通宵不能息
山深林遠去冥冥
清露寒霜損毛翼

梅

江東梅樹江西客僻地相逢眼俱白雜花亂草鬪青春
玉樹瓊枝比顏色輕陰漠漠寒不返清雨高風旦連夕
惜無白日照芳菲決雲之劍那能得忽憶曾過上林苑
五柞長楊心所識結根擢秀皆尋常得地翻宜帝王側
后皇嘉樹無遠邇爾生自合居南國勉留佳實和君羹
丁寧婦女無所摘

蒲萄

蒲萄本自涼州域漢使移根植中國涼州路絕無遺民

蒲萄更為中國珍九月肅霜初熟時
寶璫碌碌珠累累凍如玉醴甘如飴
江南萍實聊等夷漢時曾用酒一斛
便能用得涼州牧漢薄涼州絕可怪
今看涼州若天外

和道粹探春

去歲探花煩兩郎今年逢春情更長
廣文主人似知我一首新詩能發狂
載酒可以過揚子肩輿不嫌干辟彊
東風老去甚容易百日醉倒我無妨

岳州引水詩

洞庭清波一千里城中釀酒常無水泥塗遠汲人共悲
餅缶屢空甕亦恥鑿井引竿高下流清泉泠泠六物修
邦人已息漢陰拙楚酒無復邯鄲憂誰謂機心有機械
大賢事業終除害

去年得澄心堂紙甚惜之輒為一軸邀永叔諸君
各賦一篇仍各自書藏以為翫故先以七言題其
首

六朝文物江南多江南君臣玉樹歌擘牋弄翰春風裏

斷冰析玉作宮紙當時百金售一幅澄心堂中千萬軸
攜辭欲卷東海波乘興未盡南山竹樓船夜濟降幡出
龍驤將軍數軍實舳艫銜尾獻天子流落人間萬無一
我從故府得百枚憶昔繁麗今塵埃祕藏篋笥自矜玩
亦恐歲久空成灰後人聞名寧復得就令得之當不識
君能賦此哀江南寫示千秋永無極

題永叔白兔同貢甫作

梁王兔園三百里不聞有與雪霜比今公畜此安取之

瑩若寒玉無磷緇春秋書瑞不常有歷年曠世曾一偶
寧知彼非太陰魄鳳凰麒麟亦郊藪周南之人公腹心
張置肅肅橫中林獻全不損一毫末顧直肯計千鈞金
雕籠密檻回君寵初不驚人有時拱由來文采絕世必
見羈豈能隨衆碌碌自放原野為

三清殿木槿

三清殿前木槿樹朝繁夜暗自相催晨光始出洛水上
暮雨又下雲陽臺仙姬神女衣服麗紫玉雜佩垂玫瑰

春餘衆木苦寥落，況乃漸逼清秋來。繁花滿目真可惜，
稍稍萬戶鋪蒼苔。黃冠道士情意薄，見似不見年年開。
清風滿席車馬少，莫與共賞傾金罍。嘗疑壺中有仙術，
安得升天繫白日。

和吳九元會

漢家初成長樂宮，亦以十月朝。百工武夫崛起少儀節，
秦制苟簡非王風。猶云始知天子貴，此甚可笑田舍翁。
聖朝禮樂百年備，文物寢盛兼義農。月正元日古所用，

數歲一講賓王公東至日出西太蒙南極丹穴北崆峒
重譯款關惟恐後奉琛薦幣無不恭太常調樂辦韶武
少府拭璧差桓躬旗常卷舒王路肅干羽出沒頑民從
協風入律效朔易瑞雪盈尺迎年豐陰慘陽舒變頃刻
天決地闢含冲融君看此等聖人事豈得復顧叔孫通
道旁擊壤九齡叟校室受書三尺童慣習昇平不自覺
豈悟帝力高無窮賴君作詩播英實如以鳴鼓祛昏聩
吾知朝廷億萬載與地侔富天比崇

荊州兒歌

都盧小兒歌且舞口吹鳴笛手擊鼓日落羣遊塵土中
噉咷不分已與楚年年送臘迎春光家家相隨夜開戶
嗟汝兒曹舞更歌及爾不為如老何

贈文顯

古來畫工著名者吳氏鬼神韓氏馬鬼神既偽不足稱
狗馬空難亦多假顯師幼年獨寫人至今精絕疑有神
灑毫便覺面如面後素脩訝身觀身高冠長劍天子側

他時金聲復玉色師皆對之槃礴羸衆謂十常八九得
諸公固為廊廟賢麒麟未畫宜私傳一邱一壑吾亦可
煩仗丹青無間然

戲作汎槎篇呈知府給事

君不見枯槎去時八月風海水自與天河通飄飄反出扶
桑上恍惚遍歷羣仙宮宮旁佳人瑩如玉邂逅相聚歡
不足詐言物外日月長正苦歸來光景促回頭稍與煙
霞隔世人空辨支磯石伯勞燕子東西飛惆悵中間斷

消息

春日作

天王城西金明池三月欲盡花菲菲遊人白馬黃金羈
駢駢結駟來金堤禁城恩波無遠通清光面面均流水
賞閣後小桃同景純作

僕本山野之生民不堪刺促拘冠紳江湖自放老將至
豈悟歲月如馳輪謬隨多士貢王府浪得虛名通紫宸
遽從下列居第一當時頗似稱平津感激更思報天子

僂僂從事希涓塵濫書閤籍比朝舊驟上天祿均儒臣
肖躬顧影每自愧譬如蒿艾參松筠未能引分拂衣往
正用飽食慙懸鵠太平中外雖少事賢哲馳驚猶辛勤
幸無官守逃吏責自可昏醉窮青春天桃花繁高倚樓
似若有意娛佳賓浩歌大笑忘檢局座客歡倒知吾真
東風瞥來能幾時況子東西南北人人間會合常苦少
擊鮮舉白毋羞貧林端啼鳩風雨夕異方相憶空酸辛

土牛行

立春自昔為土牛古人設象今人愁豈有范泥作頭角
便可代天熙九疇村夫田婦初不知續紛園遠爭相祈
皆云宜蠶又宜穀拜跪滿前同致詞由來人事常反覆
久立要津寧爾福請看今者拜跪徒少選分張取其肉
牛實無知何用祭牛能有情豈不媿化育萬物非爾才
世人資爾聊為戲

胡九齡畫牛歌

書契已來有繪事畫牛著牛今始二胡生戴氏雖異時

形似之間實兄弟鬼神易寫狗馬難古人舊語乃信然
不爾寥寥千萬年筆墨曠絕無比肩胡生曾畫百一牛
變態曲盡稱為尤翰林主人題辭古四海文士歌賦優
俗情護前喜排後此事戴嵩未曾有會知誦玩無已時
畫與胡生俱不朽

同鄰幾觀中道家書畫

宋公好古天下聞法書奇畫多求真獨將文雅遺後世
官雖貴達家尤貧近自唐室遠及秦上下畧數千餘春

丹青翰墨著名者一二收拾忘辛勤象賢濟美聲不墜
手澤鉅細皆如新朝廷交遊累千百未嘗肯示尋常人
蔡侯江翁與梅伯子今磊落稱絕倫退朝相從得盡見
更覺清門無雜賓鑒微賞異極毫髮四座若獲千金珍
往往發狂或大叫詠詩落筆爭紛綸我隨衆人久碌碌
學殖欲落衣生塵願登羣玉探禹穴不憚山海馳舟輪
此君家近未宜後率然欲往懷逡巡淹留祇覺歲月老
復恐異物潛通神但傳妙唱想絕蹟誦歎慷慨書摺紳

西戎行

吾聞聖人之兵有不戰不戰之勝善之善況復良將握
天威西戎雖強安得擅憶昔屬國羽書聞中宴徹酒詔
圖勲丞相陳謀御史請獨可遣將誅其君吏民註誤不
足治我以威德周無垠尚書侍郎盡明哲秉鉞載旆如
火烈羽林積卒明號令賊兵蹙戚憂巢穴方春緩誅已
偷息天不假易行勦絕太常請獻象功舞史臣願勒西
山岳懸頭藁街敕狂慢積粟金城撫疲荼西戎行告爾

勿逆果自坑百蠻來威天下平

題浙西新學

文翁昔時理蜀土能令蜀人似鄒魯范公今者鎮江東
亦云教化似文翁文翁范公本同志蜀人吳人有殊異
蜀人之先自魚鳧不聞道德能過吳吳前泰伯後季札
禮讓繼為天下師迄今遺風未全滅得逢賢侯益昭晰
本之舊俗已相百況乃磨礱皆俊傑當時文翁化蜀者
獨有揚雄及司馬後生可畏不可誣安知不在吳公下

吳人于今歌且仰我公去矣安所倣願公上佐王明
姬文孔術從茲行

戲金壺道士法墨走筆雜言寄鄰幾聖俞

狂鯨蕩海海逆潮巨鼇抃山山動搖疾雷勁風自相薄
潛鱗伏介俱不聊我無巨麴復藉糟無思遠人心忉忉

公是集卷十七

勿逆果自坑百蠻來威天下平

題浙西新學

文翁昔時理蜀土能令蜀人似鄒魯范公今者鎮江東
亦云教化似文翁文翁范公本同志蜀人吳人有殊異
蜀人之先自魚鳧不聞道德能過吳吳前泰伯後季札
禮讓繼為天下師迄今遺風未全滅得逢賢侯益昭晰
本之舊俗已相百況乃磨礱皆俊傑當時文翁化蜀者
獨有揚雄及司馬後生可畏不可誣安知不在吳公下

吳人于今歌且仰我公去矣安所倣願公上佐王明
姬文孔術從茲行

戲金壺道士法墨走筆雜言寄鄰幾聖俞

狂鯨蕩海海逆潮巨鼇抃山山動搖疾雷勁風自相薄
潛鱗伏介俱不聊我無巨麴復藉糟無思遠人心忉忉

公是集卷十七